

Юбилей

# Мар бордын Ар-Сергилэн кужымеэ?

**Удмуртиысь калык писатель Вячеслав Ар-Серги 60 аресъем юбилейзэ пусйиз Йёскалык библиотекаын, «С акцентом — моим» жыт ортчытыса.**

Юбиляр но тунсыко, куноосыз но йёнось, зечкыланьёс но шунитэсь вал. Отем куноосты кырзанэн пумитазы. Люкаськем калыклы зеч мылкыдзэ сётыва, ужрадэз усътиз фольклор кырзанья но эктонья «Айкай» театр. Нош калык трос вал — шаерысьтымы кивалтисьёс, министрёс, тодосчиос, пöртэм выжы калыкёслэн огазеяськоньёс-сылэн ёзчиоссы, студентёс, писательлэн эшъёсыз, чыжы-выжыосыз.

Удмуртилэн Тöроезлэн но Правительстволэн администрациенызы кивалтись Сергей Смирнов лыдзиз Александр Бречаловлэсь зечкыланзэ. Шунит кылъёссэс веразы Дэри но Пичи Пурга ёросёслэн йыръёссы Константин Русинов но Сергей Юрин. Пунэме өз кылы юбиляр но, В. Ар-Серги шуиз:

— Улон-вылонэн герзаськем юаньёс шугъяськыто, мöзмыны кутскисько ке, мон жингыртисько Константин Николаевичлы. Нош Л. Толстой, Ф. Достоевский сярисъ вераськеме потэ ке, виль омыр уг тырмы ке, жингыртисько Пичи Пургала, нуназе бере вуо шуыса. Сергей Васильевич пумитам ваза: возьмасько.

Юбилярлы азыланяз тазы ик чырткем ужаны тазалык сйизис культура министр Владимир Соловьёв:

— Та таш-таш удмурт воргоронзэ тодйсько туж



Удмуртиысь калык писатель Вячеслав Ар-Серги (шорысез) Пичи Пурга ёросысь кивалтисьёсын Сергей Юринэн но Василий Москвинэн.

кемалась. Споръяськыськом, кенешиськом, эшъяськыськом туннэ но. Калык писатель луон понна, бадзым талант сян, юн сям но кужмо инъет кулэ. Та ласянь В. Ар-Сергилы удалтэм: кузпалыз, Удмуртиысь культура удывысь дано ужась Галина Сергеева, сое вала, юрттэ, — шуиз В. Соловьёв.

В. Ар-Сергилы виль лыдзисьёс сйизис Кун Кенешысь Наука, дышетонья, культура, нациосын но егитъёсын ужан политика ялан ужась комиссия кивалтисьез Татьяна Ишматова.

— Туннэ дугдылытэк трос вераны луоз Вячеслав Ар-Серги сярисъ. Но со кадъ трос вераськыны — улон, творчество, адямиос, шугъяськытысь но

шумпоттись ужпумъёс сярисъ — нокин но уз быгаты, дыр. Вячеслав Витальевич кылыныз котькуд ёсэз усътэ, со Инмарен сётэм быгатонлык. Со писатель гинэ өвёл, со кышкасьтэм но зэмлыкез гажась адями, — шуиз Т. Ишматова.

Писательлэн творчествоезлы дунъет сётис но удмурт кыл сярисъ статьяосыныз нимаз бичет поттыны чектис критик, филология наукаосъя кандидат Александр Шкляев:

— Мон уг тодйськы, ку берлозэ тамында калык люкаськылиз литература жытэ. Тырмем зал возьматэ В. Ар-Сергилэсь кужымзэ. Мар бордын кужымеэ? Со прозаяз шальк-шальк характеръёсты возьматэ.

Али цензура өвёл, соин ик писатель котьма сярисъ эрико гожъя. Таиз ласянь В. Ар-Сергилы удалтис. Нош лыдзисен — өз, малы ке шуоно литератураен вожвильяське Интернет. Нокыче но вотэс уз быгаты адямиез малпаськыны косыны, талы дышето литература но писатель.

Книга герза калыкёсты но кунъёсты. В. Ар-Сергилэсь кылбуръёссэ табере лыдзозы ини Турциын но. Юбилей жытэ вуиз Турциысь Кайсерийсь Эрджиес университетсы нылкышно профессор, кылысь кылэ берыктись Севинч Учгюль. Со туж умой вераське зуч кылын.

— Ми 8 ар чоже Интернет пыр гожъяським но, тани, Ар-Серги өтемен, мон татын.

Солэн чуръёсаз шöдйське шунитэз, крезьгурез, кужымеэ, но татчы вуыса, мон адзисько, кыче со чылкыт сюлэмо адями но зэмос патриот. Тау шуэме потэ лыдзисъёслы но, тйляд синъёсады адзиське зэмос, номырин мертантэм яратон, та секыт вакытёсы со туж кулэ. Дорады лыктыса, мон валай: асьмелэн ваньмыз умой луоз одно ик, сюлэмъёсамы яратонлэн тылгизыюсыз кенжизы ке, — мылкыдзэ усътиз Севинч Учгюль.

Турциысь тодосчи та жытын лыдзиз Ар-Сергилэсь 2 кылбурзэ. Трос кылбуръёссэ лыдзиз ачиз автор но.

Жыт кутскыку, учкисьёс пöлын кивалтисьёс, журналистъёс, дышетисьёс, тодосчиос пуказы ке, бöрысьгес ваньзы соос литератураез яратисьёслы, сак кылзисьёслы пöрмизы.

Юбилее кузымтэк уг ветло. Кылсярисъ, «Трос гожтод ай зарни пус, татчы тыр, тани картуз» шуыса, писательлы картуз кузьмась Пичи Пурга ёросысь Депутатъёслэн Кенешылэн кивалтисез Василий Москвин. Дэри ёросысь Лудорвай школалэн директорез Надежда Мерзлякова писательлы миндэр кузьмась, произведениоссэ гожъян висказ мед шутэтскоз шуыса, нош Казмас школалэн директорез Елена Кабанова ваем В. Ар-Сергилэсь портретсэ. Сое суредаллям школаысьтызы нылпиос. Юбиляр но кунооссэ буш кыин өз келя: котькудиз В. Ар-Сергилэн виль книгаеныз дораз бертиз.

Галина СЕМЁНОВА

Кивоштисьёс

## Егит гожъяськись, лыкты «Чурыт пус» студие!

**Йёскалык прессалэн юртэз «Кенеш» журнал бордын «Чурыт пус» лаборатория усътиз.**

Проект радъяське «Шунды» огазеяськонэн чош, Печать но ивор вöлмытонья агентстволэн юрттэменыз.

«Чурыт пус» лаборатория улсын ар чоже пöртэм ужрадъёс ортчозы. Кылсярисъ, «Кенеш» журнал бордын кылдытэмын егит авторъёслэн студизы. Отчы ветлыса, пинал гожъяськисьёс кылзэс волятыны, удмурт литературае мургес зымыны быгатозы.

«Чурыт пус» лаборатория улсын ик та вакытэ «ВКонтакте» бамын мыно ни «Сюлэмам — поэзия» но «Сюлэмам — проза» литературной онлайн-марафонъёс. Кылбурчи, «Кенеш» журналлэн редакторез Анастасия Шумилова но писатель, удмурт арт-проектъёслэн кичöлтисьсы Дарали Лели арнялы быдэ ужъёс сётъяло, нош марафонэ пыриськисьёс соосты быдэсто. Кылбурчиос суредъя но, эпиграфен но кылбур гожтисы, верлибрен но шудисы ни, прозаикъёс туалалэн удмурт батырлы, кочышлы, пунылы

сйзем текстъёс, озы ик суред-сериал пöрмытисы ни.

12-тй оштолэзе «Туала удмурт литература: аспöртэмлыкёсыз но азылань сюресзэ» котырес жöк съöры Йёскалык библиотекае люкаськызы тодосчиос, писательёс, егит авторъёс — оглом вераса, ваньмыз, кин тунсыкъяське туалалэн удмурт литератураен.

«Чурыт пус» лабораторилэсь ужзэ дунъяны луоз «Кенеш» журналлэн нимаз поттэм бичетэзъя. Отысь лыдзисыны луоз студие ветлэм авторъёслэсь чуръёссэс.